

Noticia
Transparente
di Gobierno

ISLA ONLINE

Diamars 10 September 2024

Email: IslaOnline@gobierno.aw Tel: 528-4952



**STABILIDAD
Y
PROSPERIDAD**
2 0 2 4

Gabinete Wever-Croes



APERTURA DI AÑA PARLAMENTARIO 2024-2025



Diamars mainta, 10 di September, a tuma luga e apertura di Aña Parlamentario 2024-2025. E ceremonia aki a tuma luga na Parlamento di Aruba, na unda cu S.E. Gobernador di Aruba, Alfonso Boekhoudt a declara e aña Parlamentario habri. Esaki ta e di 39 Aña Parlamentario di Pais Aruba y e ta un momento hopi solemne pa e organo di mas importante di Pais Aruba.

Prome Minister Evelyn Wever-Croes e expresa cu e aña aki, e ceremonia pa cu e Aña Parlamentario tabata uno diferente, mirando cu Parlamento despues di 3 aña ta conta cu un presidente nobo, cu lo sinta pa un periodo cortico prome cu eleccion na december proximo.

"Mi ta desea tur parlamentario hopi exito, sabiduria y tambe hopi pasenshi den e siguiente tres lunanan aki. Parlamento di Aruba ta e sala na unda desicionnan grandi pa nos pais ta wordo tuma, y p'esey ta importante pa nos parlamentarionan y ministernan ta uni. Ta solamente hunto nos lo por logra cosnan grandi pa pais Aruba", Prome Minister Evelyn Wever-Croes a expresa. ■■■





MINISTER ENDY CROES TA FELICITA IBISA CU UN EXITOSO TURIBANA RACE 2024

Diadomingo ultimo, a tuma luga e famoso Turibana Race. Un magno evento deportivo cu a conta cu alrededor di 600 coredo cu a participa den diferente categoria. E careda a start 6 or di mainta for di MFA Noord y a pasa den e cayanan di Noord. Minister Endy Croes tabata presente na e di 44 edicion di Turibana Race Walk & Run 10.5K, 5.5K Relay y Kids Run pa duna e coredonan sosten y apoyo.

Na final di e evento Minister Endy Croes a haci entrega di premio na e ganadonan. Sra. Lana Gobert y Sr. Jethro Saint Fleur ta e ganadonan di e 44 edicion di Turibana Race 2024. Por ultimo, Minister Endy Croes ta felicita tur cu a participa na e 44 edicion di Turibana Race. Alabes ta gradici e team di IBISA, tur stakeholder y boluntario cu a yuda haci e careda aki uno exitoso! Pabien na tur e ganadonan! ■■■



MINISTER ENDY CROES TA FELICITA FAMIA FRANKEN-GEERMAN CU 35 AÑA DI EXISTENCIA DI DJIESPIE'S PLACE

A otorga reconocimiento na Sra. Lucia Geerman-Rasmijn pa su dedicacion y amor durante 35 aña pa Djiespie's Place

Recientemente, Minister di Enseñansa y Deporte Endy Croes acompaña pa su kerida esposa Dilailah Croes a acudi na celebracion di Djiespie's Place cu a cumpli 35 aña dia 31 di juli ultimo. Na aña 1989 Sr. Djiespie Franken hunto cu su esposa Sra. Cecilia Franken y cuña Sra. Rita Geerman a tuma e refresqueria over di Sr. Zepp Wever (den feliz memoria). Lucia Rasmijn, kende ta subrina di Cecilia y Rita, ta trahando desde inicio cu nan y e aña aki a cumpli 35 aña trahando na Djiespie's Place.

Durante e anochi ameno, Minister Endy Croes a felicita e propietario pa nan dedicacion, vision y excelente contribucion den e sector economico di Aruba durante 35 aña. Alabes, a otorga reconocimiento na Sra. Lucia Geerman-Rasmijn pa su dedicacion y amor durante 35 aña pa Djiespie's Place. Nan ta esunnan encarga pa traha e dushi saladanan cu ta bay den e pan bruin y stok brood cayente di tur dia. Rita ta esun cu ta hasa tur e kroket- y loempianan. Cecilia ta traha e dushi pan cu bacalou, pan cu carni stoba y e dushi sopi carni di tur diabierna anochi. Actualmente, e yiunan ta encarga cu e negoshi.

Minister Endy Croes ta gradici ful e team di Djiespie's Place cu durante 35 aña a traha cu hopi amor y a brinda un tremendo servicio na nan e clientelanan. Masha pabien cu 35 aña di existencia. ■■■■



Minister Endy Croes:

PA PROME BIAHA DEN HISTORIA A INICIA CU AÑA 4 Y 5 NA SPO



Recientemente, Minister di Enseñansa y Deporte Endy Croes a haci un bishita oficial na Scol Practico pa Ofishi (SPO) Brazil. Director di SPO Brazil Sr. Marc Thiel y juffrouw Greta a ricibi e mandatario di Enseñansa cu un caluroso bonbini. Minister Endy Croes a haya un recorrido na e scol, primordialmente den klas 4. Manera a splica na inicio di aña escolar, pa prome biaha den historia a inicia cu aña 4 y 5 na SPO.

Antes e estudio na SPO tabata te cu aña 3. Cu e cambio aki, ta brinda e alumnonan cu ta hopi jong pa drenta mercado laboral, e oportunidad pa sigui studia y prepara nan mes mas miho. Sr. Thiel a indica cu tin tres (3) grupo a inicia e aña aki pa nivel di ABO 1: un grupo di Horeca, un grupo di Bouw y un grupo di Preparacion pa Labor. Sr. Thiel a sigui bisa cu nan ta cla pa inicia cu e programa di dos (2) aña cu ta certifica na nivel di ABO 1.

Finalmente, Minister Endy Croes a gradici e cabesante Sr. Marc Thiel y ful e team di SPO Brazil cu ta contribui den e desaroyo di e alumnonan. Alabes, ta gradici e comision cu diseña e proyecto aki na bienestar di e alumnonan di SPO Brazil y SPO Santa Cruz. Hopi exito e aña escolar aki. ■■■



2024

AÑA DI STABILIDAD Y PROSPERIDAD



Gabinete Wever-Croes

Arte di Muraya ta un expresion di creatividad sin limite cu ta transforma murayanan di San Nicolas den un galeria bibo cu ta conta historia, transmit emocion y tambe ta stimula e orguyo di un comunidad.

